

كلماتي

تعيش الليل في عين سودا
ولكن كحلها ده نهار
وتقنع فكرك الميؤوس
بان العزف ع الأحلام
كمنجة بس دون أوتار
وليه تختار تهاجر
جوة خطوة وحيد
ووطنك هو حبة خوف
تزف الفرحة للتجديد
وتعمل ف الدموع معروف
عشان نصك بني آدم
ونصك فيه جينات لملاك
ولحن الشر مش معزوف
فأنا وانت
وكتير بندور على الكلمة الي لفانا

مدار الطيبة يجمعنا
ونفضل نسمع الإعجاز
في أي فضيلة بين الناس
ولا نلقى اللي يسمعنا
وندعي ربنا والكون
بأنه بالبصر هنصون..
نغض الطرف عن شهوة..
حلال الدنيا متعنا
حقيقي نجومنا مش لامة..
ومش واصلة لسما سابعة
عجيب حلمك..
رقم تسعة
وتامن معجزة ف عقلك
ورغم الشدة والأوجاع
كفوف الدعوة والأحلام
لحد سمانا ترفعنا..
لحد سمانا ترفعنا...